

Broj:06-03-748-02/15
Mostar, 04.11.2015. godine

Na osnovu člana 21., člana 22., člana 37., člana 38. i člana 87. stav (3) Zakona o električnoj energiji u Federaciji Bosne i Hercegovine („Službene novine Federacije BiH“ broj 66/13), člana 10, člana 11., člana 20. stav (1) i člana 23. stav (1) Statuta Regulatorne komisije za energiju u Federaciji Bosne i Hercegovine („Službene novine Federacije BiH“ broj 24/14), člana 8. stav (1), člana 32. stav (4) i člana 45. Poslovnika o radu Regulatorne komisije za energiju u Federaciji Bosne i Hercegovine („Službene novine Federacije BiH“ broj 29/14) i člana 52. Pravilnika za izdavanje dozvola („Službene novine Federacije BiH“ broj 43/14), te na osnovu podnesenog Izvještaja o nadgledanju imaoaca dozvole „IVEX“ d.o.o. Usora, Regulatorna komisija za energiju u Federaciji Bosne i Hercegovine – FERK je 04.11.2015. godine na XIX redovnoj sjednici donijela sljedeće

R J E Š E N J E

1. Nalaže se „IVEX“ d.o.o. Usora, imaoцу Dozvole za rad - licence za obavljanje elektroprivredne djelatnosti proizvodnje električne energije broj 06-03-963/53/12 od 28.11.2012. godine, preduzimanje sljedećih mjera **bez odlaganja**, u skladu sa uslovima izdate dozvole po tačkama kako slijedi:

a) Obavljanje licencirane djelatnosti

Tačka 3.1. Dozvole za rad - licence za obavljanje elektroprivredne djelatnosti proizvodnje električne energije- Prilog 1

- 1) da ugradi sistem nadzora i upravljanja,
- 2) da obavještava FERK o preduzetim aktivnostima iz ove tačke.

b) Zakoni, propisi i tehnički standardi

Tačka 4.1.2. Dozvole za rad - licence za obavljanje elektroprivredne djelatnosti proizvodnje električne energije

- 1) da dostavi kopiju Pogonskog uputstva za solarnu fotonaponsku elektranu „IVEX“, odobrenu od strane nadležnog Operatora distributivnog sistema.

c) Mjerni uređaji

Tačka 4.5.2. Dozvole za rad - licence za obavljanje elektroprivredne djelatnosti proizvodnje električne energije

- 1) da dostavi Zapisnik o tehničkom pregledu mjernog mjesta za solarnu fotonaponsku elektranu „IVEX“ na kojem se vrši primopredaja električne energije.

d) Finansijski i tehnički podaci

Tačka 4.15.2. Dozvole za rad - licence za obavljanje elektroprivredne djelatnosti proizvodnja električne energije

- 1) da dostavlja sve finansijske i tehničko-energetske podatke, na propisanim formularima i u rokovima definisanim Pravilnikom o izvještavanju za imaoce licence za djelatnost snabdijevanja električnom energijom II reda i nezavisne proizvođače, što predstavlja trajnu obavezu imaoaca dozvole.

e) Računovodstvene aktivnosti

Tačka 5. Dozvole za rad - licence za obavljanje elektroprivredne djelatnosti proizvodnje električne energije

- 1) da vodi poslovne knjige i radi finansijske izvještaje za djelatnost proizvodnje električne energije, odvojeno od ostalih djelatnosti, što predstavlja trajnu obavezu imaocu dozvole,
 - 2) da evidentira stalna sredstva za proizvodnju električne energije i vrši obračun troška amortizacije za ona stalna sredstva koja se koriste za obavljanje djelatnosti proizvodnje električne energije, te na godišnjoj osnovi dostavlja konto-kartice obračuna amortizacije, što predstavlja trajnu obavezu imaoca dozvole,
 - 3) da vodi evidenciju stalnih sredstva za djelatnosti proizvodnje električne energije, u skladu sa MSFI i MRS, na način koji će omogućiti praćenje namjene svakog sredstva da bi se jasno moglo odrediti koja se sredstva koriste u obavljanju djelatnosti proizvodnje električne energije, što predstavlja trajnu obavezu imaoca dozvole,
 - 4) da obavještava FERK o preduzetim aktivnostima iz ove tačke.
2. Ovo rješenje je konačno i stupa na snagu danom donošenja, te se objavljuje na oglasnoj tabli i internetskoj stranici FERK-a.

O b r a z l o ž e n j e

Postupajući u skladu sa Zakonom o električnoj energiji („Službene novine Federacije BiH“ broj 41/02, 24/05, 38/05 i 83/11) propisanim nadležnostima, FERK je imaocu dozvole „IVEX“ d.o.o. Usora Rješenjem broj 06-03-963-10/53/12 od 28.11.2012. godine izdao Dozvolu za rad - licencu za obavljanje elektroprivredne djelatnosti proizvodnje električne energije broj 06-03-963/53/12 za proizvodni objekat solarna fotonaponska elektrana „IVEX“. Period važenja navedene dozvole za rad – licence je do 27.11.2017. godine.

U navedenoj dozvoli za rad u tački 3.1. propisano je da je imalac dozvole ovlašten obavljati djelatnost proizvodnje električne energije u proizvodnom objektu, solarna fotonaponska elektrana „IVEX“ (na krovu poslovnog objekta „IVEX“ d.o.o. Usora, naselje Žabljak, opština Usora) instalisane snage 30 kWp DC (25 kW AC) i predviđene godišnje proizvodnje 31,977 MWh čiji su tehničko-energetski parametri dati u Prilogu 1 dozvole.

Tačkom 4.1.2. iste dozvole propisano je da je imalac dozvole obavezan zajedno sa nadležnom elektrodistribucijom, odnosno Operatorom distributivnog sistema razraditi pogonska uputstva za svoju elektranu, dok je tačkom 4.5.2. dozvole propisano da je imalac dozvole obavezan dostaviti FERK-u pregled mjernih mjesta, kao i sve eventualne izmjene mjernih slogova odmah nakon njihovog nastajanja.

Tačkom 4.15.2. dozvole za rad propisano je da je imalac dozvole obavezan dostaviti izvještaj sa tehničko-energetskim i finansijskim podacima u skladu sa Pravilnikom o izvještavanju za imaoce licence za djelatnost snabdijevanja električnom energijom II reda i nezavisne proizvođače.

Dalje, tačkom 5. dozvole za rad propisano je da je imalac dozvole obavezan voditi poslovne knjige i raditi finansijske izvještaje za elektroprivrednu djelatnost proizvodnje odvojeno od ostalih djelatnosti, za čije je obavljanje registrovan po Zakonu o privrednim

društvima, kao i prema odredbama Zakona o električnoj energiji Federacije Bosne i Hercegovine i propisima o međunarodnim računovodstvenim standardima i međunarodnim standardima finansijskog izvještavanja.

Osim navedenog, tačkom 9. predmetne dozvole propisano je da u okviru svojih nadležnosti FERK vrši nadgledanje ispunjenja uslova iz ove dozvole, te da je u cilju ispunjenja uslova iz ove dozvole, imalac dozvole je obavezan dostavljati podatke u skladu sa tačkom 4.15. i druge dokumente, podatke i informacije na zahtjev FERK-a, koje su FERK-u potrebne u svrhu primjene Zakona o električnoj energiji u Federaciji BiH, da bi FERK-u omogućio izvršavanje njegovih nadležnosti u skladu sa zakonom i pravilima i propisima FERK-a. Takođe, propisano je i da je imalac dozvole obavezan obavijestiti FERK o svakoj povredi uslova dozvole u roku od 10 dana od saznanja da je došlo do povreda. Ovlašteni zaposlenici FERK-a, u skladu sa ovom tačkom, imaju pravo obavljati redovno i vanredno nadgledanje u prostorima imaoca dozvole da bi izvršili uvid u obavljanje elektroprivredne djelatnosti po obavezama datim u dozvoli, te je imalac dozvole obavezan saradivati sa FERK-om tokom pripreme i prilikom obavljanja nadgledanja.

Tačkom 11. dozvole za rad propisano je to da ukoliko FERK zaključi da imalac dozvole nije ispoštovao ili krši uslove dozvole, preduzima sljedeće aktivnosti: a) opominje imaoca dozvole o evidentiranim nepravilnostima b) podnosi prekršajni nalog c) pokreće postupak oduzimanja dozvole za rad.

Na osnovu člana 21., člana 22., člana 38. i člana 87. stav (3) Zakona o električnoj energiji u Federaciji Bosne i Hercegovine i člana 52. Pravilnika za izdavanje dozvola, odnosno u skladu sa tačkom 9. Dozvole za rad - licence za obavljanje elektroprivredne djelatnosti proizvodnje električne energije broj 06-03-963/53/12 od 28.11.2012. godine u proizvodnom objektu solarna fotonaponska elektrana „IVEX“, 25.08.2015. godine Komisija za nadgledanje obavljanja licenciranih djelatnosti imenovana Rješenjem FERK-a broj 05-08-422-05/15 od 11.06.2015. godine izvršila je nadgledanje obavljanja djelatnosti proizvodnje električne energije. Tokom nadgledanja, navedena komisija je, uvidom na licu mjesta, utvrdila da u proizvodnom objektu „IVEX“, imalac dozvole nije osposobio sistem nadzora i upravljanja, kao i da nije vodio poslovne knjige i radio finansijske izvještaje, odnosno nije računovodstveno razdvojio djelatnost proizvodnje električne energije od drugih djelatnosti.

O izvršenom nadgledanju, komisija je sačinila Izvještaj o obavljenom regulatornom nadgledanju, koji je dostavljen imaocu dozvole na davanje komentara pod brojem 06-03-748/15 dana 21.09.2015. godine. Imalac dozvole je 28.09.2015. godine u FERK pod brojem 06-03-748-01/15 dostavio dopis „Odgovor na Izvještaj o obavljenom regulatornom nadgledanju“, u kojem je dostavio dio traženih podataka po predmetnom izvještaju, obrazloženje vezano za rad sistema nadzora i upravljanja, kao i informaciju da je pokrenuo aktivnosti na rješavanju ostalih nedostataka, datih preporukama koje je komisija za nadgledanje FERK-a dala u svom Izvještaju od 21.09.2015. godine.

FERK je na XIX redovnoj sjednici održanoj 04.11.2015. godine analizirao Izvještaj o obavljenom regulatornom nadgledanju, kao i dostavljene komentare imaoca dozvole, od kojih je neke komentare nakon pažljivog razmatranja usvojio, a za neke je ocijenio da isti nisu opravdani, a sve u skladu sa svojim pravilima i propisima i uslovima dozvole za rad.

FERK je utvrdio da je potrebno imaocu dozvole naložiti preduzimanje mjera, navedenih u dispozitivu ovog rješenja, da bi se otklonile sve učinjene povrede izdate dozvole za rad, i to bez odlaganja.

Postupanje imaoca dozvole po naloženim mjerama je naročito važno iz razloga što FERK ima mogućnost u skladu sa članom 21. i članom 108. Zakona o električnoj energiji u Federaciji Bosne i Hercegovine, odnosno članom 53. Pravilnika za izdavanje dozvola, a slijedeći navedeno i u skladu sa tačkom 11. izdate dozvole za rad – licence pokrenuti postupak za izdavanje prekršajnog naloga, te postupak oduzimanja dozvole.

Na osnovu naprijed navedenog, odlučeno je kao u dispozitivu ovog rješenja.

POUKA O PRAVNOM LIJEKU:

Protiv ovog rješenja imenovani može tužbom pokrenuti upravni spor kod Kantonalnog/Županijskog suda u Mostaru u roku od 30 dana od dana primitka rješenja. Tužba se predaje sudu direktno ili mu se šalje poštom preporučeno. Tužba se može izjaviti i na zapisnik kod navedenog suda ili bilo kojeg drugog suda.

PREDSJEDNICA FERK-a
Sanela Pokrajčić